

COMUNICÂT STAMPE

MUSICHE: ARLEF DUTUN CUN FOLKEST 2012

Udin, ai 20 di Jugn - Di simpri la musiche al è un strument formidabil par fâ cori une lenghe in dut il mont e par fâle rivâ al cûr da la int e sore il dut dai plui zovins. Par chest **l'Arlef-Agenzie regionâl pe lenghe furlane** e à strent cun Folkest, un dai plui impuartants festival di musiche folk de Europe che si tignarà chest an dai 5 ai 30 di Lui in 27 localitâts dal Friûl Vignesie Julie, Venit e Slovenie, une colaborazion che e à tant che obietîf chel di pandi la lenghe furlane in chê strasordenarie farie musicâl che e ospite ogni an une sessantine di artiscj di dut il mont e un public numerôs e cualificât.

"La musiche dolce di une lenghe fuarte" al è il mes che al è stât sielzût di bande de Arlef par inviâ chest sosten al festival che cul furlan al è, dal rest, nassût - pes primis cuatri edizions dal 1979 al 1982 si clamave "Fieste di Chenti" - e che de promozion culturâl des regions storichis des lenghis minoritariis de Europe al è stât un pionîr in Italie.

"Folkest - al comente il president de Arlef, Lorenzo Zanon - al è un event che al è di simpri peât al teritori e al è ancje un contignidôr di apontaments che a judin l'integrazion e la cognossince di culturis e lenghis diversis: par chest al è cetant impuartant che la Agenzie e Folkest si sedin metûts adun par lavorâ insiemit a pro de lenghe furlane".

Pe edizion 2012 dongje dai grancj artiscj europeans e talians tant che Alice, Neri Marcorè e Roberto Vecchioni ancje i musiciscj furlans Lino Straulino, il grup dai "Nosisà" e Priska.
Par informazions e program: www.folkest.com

CUN PREIERE DI PUBBLICAZION E DIFUSION